

200 francs per chiffar cannabis?

L'opiniun da quatter cussegliers naziunals dal Grischun

DA CLAUDIA CADRUVI / ANR

■ **Las duas chombras federalas n'èn betg perina pertutgant il chasti per chiffers creschids. Er ils parlamentaris grischuns han opiniuns divergentas. Fimà in joint n'hajan els anc mai – sincereschan els.** Tge pensais Vus dal chasti da 200 francs per chiffers? Ed avais Vus sezs gia fimà ina giada in joint? Cun questas duas dumondas ha l'anr confrontà *Silva Semadeni, Hansjörg Hassler, Josias Gasser e Martin Candinas*.

Il resultat: Ils quatter cussegliers naziunals n'èn betg chiffers. Els na fiman betg cigarettas nundir hasch u marihuana. Puncto autezza dal chasti per chiffers van lur opiniuns dapart.

200 francs è damemia

«In chasti da 200 francs ma para exagerà», di Silva Semadeni (ps). «I pertutga gea creschids ch'èn sezs responsabels per quai ch'els fan.» Cun fimar chonv na pericliteschian ins betg autras persunas – betg sco automobilists che gijajan memia svelto cun auto. Lez muntian in privel per auters. Ma ir memia svelto cun auto vegnia chastia cun multas pli pitschnas.

In chasti da 50 u da 100 francs bastass, di Semadeni. Uschia evitass ins da scuflar si la burocrazia. Ina summa pitschna hajan ins plitost en satg e posia pajar immediat, 200 francs dentant betg.

Sezza n'ha la politicra mai sagià in joint. «Jau na sun gnanca buna da fimar ina cigaretta.» Cun 13 onns hajan ins ina giada dà ina cigaretta ad ella e fatg traitr giuadent il fim, quai haja bastà.

Er a Josias Gasser (pvl) para il chasti memia aut. Positiv saja dentant ch'ins na criminaliseschia betg pli ils chiffers – cunzunt perquai che gist l'alcohol haja per part consequenzas pli grevas ch'il consum da cannabis. La proibiziun en l'America haja gea mussà ch'ins na cuntanschia nagut cun scumonds. Impurtant saja d'emprender in adiever raschunivel.

Sez n'ha Gasser anc mai tratg vi d'in joint. El stoppia bunamain sa



Davart l'autezza dals chastis per consumar products da cannabis èn ils mainis dividids.

KEYSTONE

turpegiar da dir, ma el na fima insumma betg e n'haja perquai era anc mai chiffa.

Giustificà per Hassler e Candinas

«La summa sto far in pau mal», di Hansjörg Hassler (pbd). Cun il chasti veglian ins gea cuntanscher ch'ils consumers smettian da fimar. Perquai saja la summa tutttavia giustificada.

Na fan ins betg entiert als chiffers, sch'ins chastia els a moda pli severa che consumers da drogas diras? Cannabis muntia ina droga iniziala, di Hassler. Perquai na duajan ins betg far memia simpel als consumers.

Experientscha cun talas drogas na posseda Hassler naginas. «Da mat avain nus fimà stumbels da startugl. Suentter hai jau stui vomitar. Quai ha fatg bain. Jau n'hai suenter mai pli fimà – ni tubac ni cannabis.»

«Jau sun da l'opiniun ch'ins dastga avair ina lingua dira», di Martin Candinas (pcd). «Ins na dastga betg far sco sche quai na fiss nagin problem.» Perquai saja in chasti aut giustificà. Ins fetschia la fi-

nala gia il pass da betg pli criminalisar il consum. Cun fimar en general na possia el entschaiver nagut, di Candinas. «Cun in bun magiel vin u cun ina gervosa dentant bain.»

Chasti per creschids traplads cun fin 10 grams

Cun 91 cunter 82 vuschs insista il cussegl naziunal sin in chasti da 200 francs. Il chasti vala per creschids che consumeschan cannabis e che vegnan traplads cun fin diesch grams haschisch u marihuana.

Il cussegl naziunal ha decidì ier encunter las recumandaziuns da sia cummissiun ed encunter la veglia dal cussegl dals chantuns. La maiorità da la

cummissiun aveva giavischà in chasti da 100 francs.

En in punct impurtant van las duas chombras dentant d'accord: Tgi che ha passa 18 onns na duai en l'avengir betg pli vegnir criminalisà ed accusà pervi da consum da cannabis. Il sistem da dar chastis empè dad accusar è ina proposta che la fracziun da la pcd aveva formulà en in'iniziativa parlamentara.